



老牛欲出嫁

這一日，雲林縣元長鄉鹿南村規庄頭鬧熱滾滾，因為是老牛欲出嫁的好日子。

天拄拍陪光，規庄大細攏總起床矣，欲替老牛辦一場奢颯的婚禮。查埔人共大門搭做五彩的圓拱門，查某人掌紅圓、做紅龜粿、鼠麴粿，閣準備一牛車的嫁粧，有幼麵麵的牧草，清甜的紅菜頭恰番薯簽，向望嫁過去就會當平安順序。

老牛的主人存叔仔佇三十外年前，對彰化北斗買著這隻牛，共伊號做「老牛」。存叔仔足疼惜老牛，特別搭一間牛牢予伊蹄。熱天定定噴水替老牛沖身軀，驚蠓仔共叮，閣共晾蠓罩，伊一直將老牛當做是親人咧看待。

檣頭當無閒的時，老牛綴存叔仔起冬落冬，犁田、拖車、駛石礮、挨塗礮，伊攏是恬恬仔骨力咧做，無半句怨言。看著稻仔好收成，老牛替存叔仔歡喜。若拄著做大水抑是洇旱，老牛嘛親像有淡薄仔毋甘，予人足感心的。

日子一工一工過，存叔仔已經八十一歲，袂得通閣牽老牛去田裡作檣矣。有牛販仔出八萬箍欲共老牛牽去創，聽著人欲來買老牛，存叔仔煩惱甲袂食袂睏得。伊想講：「老牛綴我一世人，閣較濟錢嘛免數想，我袂使予老牛變做牛肉乾。」

存叔仔就四界去探聽，看有老牛安養的所在無？天公疼戇人，有雲林縣政府農業處的鬥走從，西螺農工學校嘛答應欲照顧老牛到老，予存叔仔較放心淡薄仔。

這一日，西螺農工派一台大禮車欲來娶老牛，存叔仔一面替老牛灑身軀，一面吩咐老牛：「無你做伴，我會孤單。毋過你做你去免煩惱，新厝比遮較四序，有囡仔恰你做伴，共你照顧，閣有闊莽莽的草埔仔通予你行踏，我嘛會定定去看你……。」存叔仔那交代那流目屎。老牛嘛親像了解主人的心意，目眶紅紅掠存叔仔金金看。

逐家當咧共老牛送上禮車的時陣，老牛跛步煞停落來，雄雄放一埤「人情屎」，留予存叔仔做紀念，現場的人攏足感動。人牛情深，這是一場珍貴閣感動的婚禮。

作者：張照權

☆詞彙學習☆

【蠓罩】báng-tà：蚊帳。

【檣頭】sit-thâu：農事。

【石礮】tsiòh-lún：用石頭做成圓筒形的器具，專門用來碾壓穀物，或壓實地面以成為庭院或晒穀場。

【挨塗礮】e thôo-lâng：推動土礮以磨去粗糠。

【走從】tsáu-tsông：奔波忙碌。

【灑】tsâng：沖、淋。

【闊莽莽】khuah-bóng-bóng：形容非常遼闊，一望無垠。

【掠】liáh：對著。

【雄雄】hiông-hiông：突然、猛然、一時間。

【埤】pû：堆。計算成堆東西的單位。